

Mál nr. 485/2012**M****og****Vátryggingafélag v/heimilistryggingar**

**Ágreiningur um bótaskyldu vegna tjóns á síma sem settur var með þvotti í þvottavél
þann 05.09. 2012.**

Gögn.

- 1) Málskot móttakið 02.11. 2012.
- 2) Bréf vátryggingafélags til nefndarinnar, dags. 19.11. 2012.

Málsatvik.

Fyrirliggjandi gögn upplýsa um aðdraganda máls þessa.

Vátryggingafélagið hafnar bótaskyldu. Það vísar til ákvæðis skilmála þar sem fram kemur að tjónið skal eiga rætur að rekja til skyndilegs og ófyrirsjáanlegs utanaðkomandi atviks á vátryggingatímabilinu. Félagið getur ekki fallist á að það skilyrði sé uppfyllt. Ljóst sé að síminn sem um ræðir hafi verið í nokkurn tíma í vélinni á meðan hún var í gangi og því ekki um skyndilegt atvik að ræða. Þá lítur félagið svo á að það að sími sé lagður í rúmföt sem eru síðan tekin saman og sett inn í þvottavél geti ekki talist til ófyrirsjáanlegs utanaðkomandi atviks. Gera verði þá kröfu til vátryggðs að ganga úr skugga um að ekkert sé í þvotti sem ekki má fara inn í þvottavél áður en hún er sett í gang. Félagið telur að jafnvel þó að um skyndilegt og ófyrirsjáanlegt utanaðkomandi atvik hafi verið að ræða þá bendir félagið á að samkvæmt skilmálum bætir félagið ekki tjón sem verður þegar vátryggður gleymir hlut, misleggur eða týnir. Líta megi svo á að það að síminn hafi legið í rúminu en síðan endaði í þvottavél með rúmfötum geti flokkast undir framanritaða undanskilda áhættu.

M telur bótaskyldu fyrir hendi sbr. umfjöllun hans í málskotinu.

Álit

Þegar tekið er mið af fyrirliggjandi gögnum hefur M, gegn neitun vátryggingafélagsins, ekki sýnt fram á bótaskyldu þeirrar vátryggingar sem hér um ræðir. Ekki hefur verið sýnt fram á að rekja megi tjónsatburð máls þessa til skyndilegs utanaðkomandi atviks í skilningi þeirra skilmála sem hér um ræðir.

Niðurstaða.

Bótaskylda er ekki fyrir hendi.

Reykjavík 19.12. 2012

Rúnar Guðmundsson hdl.

Valgeir Pálsson hrl.

Jón Magnússon hrl.